


Poentje Castro:

“Mi ta keda ripiti cu mi ta inocente”



ORANJESTAD (AAN): E ta declara su mes inocente, y como un persona cu tabatin djis un solo meta su dilanti: Recupera e Laptop Computer Valioso di e famoso Claudius Philips! “Mi ta keda ripiti cu mi ta inocente,” ta loke Johnny Castro a declara durante un conferencia di

prensa. Conoci como Poentje, el a keda deteni pa 6 dia largo y coriendo ainda e riesgo di worde acusa di encubrimiento.

Dilanti prensa, el a duna un splicacion riba loke a pasa, y a insisti cu desde prome dia ya caba Claudius Philips tabata na altura di su intencionan.

Tabata dia 15 di October, cu Poentje Castro a ricibi un e-mail hopi diferente riba su account di Gmail pa Un Dia Den Bida. Aki un persona cu a usa e nomber di “No Name McMason”, ta puntra si acaso e ta interesa pa haya acceso na material, incluyendo cancionnan ainda no publica.

Castro a reacciona y pidi pa haya sa di kico ta papiando aki. E ora riba Diabierna 16 di October, el a haya tres mail atrobe di e persona aki, completo cu attachments. Ora di a habri esaki, Poentje Castro a bin compronde cu nan lo ta bin di e artefactonan horta di cas di Claudius Philips.

Den e mailnan aki tin foto di grupo carnaval di OREO, foto di defunto mama, y varios movie files. Mesun dia, Poentje a contact Claudius Philips kende net e ora ey tabata te na St. Maarten. Aki Poentje informe di mail cu el a ricibi. Claudius aki a pidi mesora pa Poentje “forward” tur e material aki pe, via su e-mail account na Hotmail.

Sinembargo, ora cu Poentje manda e filenan for di Gmail pa Hotmail, a resulta cu e filenan ta mucho grandi pa Hotmail, pues nan ta bons back.

E ora Claudius Philips a pidi Poentje, pa manda nan pa Edwina Werleman kende ta Manager OREO, cu tambe tin

un Gmail account.

Asina Claudius a bin haya e mailnan, y na final el a keda convenci mesora, cu e material aki ta procedente di su Laptop Computer horta. Aki Claudius a pidi Poentje, pa por fabor, check con por haya e laptop aki

Segun Poentje Castro, ora cu Claudius a bisa esey, el a “go along” cu loke e artista a pidi, pa check si por yega na gara y yega na e laptop aki cu ta den man di hende desconoci.

Asina Poentje a bay den intercambio di e-mail, y a hasta cuminza actua ‘duro’ cu e persona desconoci aki pa convence pa e no destrui e Laptop, sino pa entregé. Den otro articulo por lesa con e proceso ey a bay, y cu na final el a haya e Laptop Computer aki, pero prome cu e por a yega na oficina di su abogado pa entrega e Laptop aki... Recherche a detene.

Poentje ta bisa aki: “Mi ta keda ripiti, cu mi ta inocente!” Aunke tin posible acusacion di encubrimiento riba dje, y na final ta Huez lo dicidi kende ta inocente of no.

**TELEFONNAN
DI DIARIO
582-6747
FAX
582-8551**